

## ODSJEK ZA GEODEZIJU I GEOINFORMATIKU GRAĐEVINSKOG FAKULTETA UNSA: VRIJEDNA DONACIJA GEODETSKE OPREME IZ SLOVENIJE

Zahvaljujući donaciji Fakulteta za građevinarstvo i geodeziju Univerziteta u Ljubljani (UL FGG), Građevinski fakultet Univerziteta u Sarajevu (GF UNSA) je od juna mjeseca 2019. godine bogatiji za 4 elektronska tahimetra. Radi se o instrumentima TC605L, renomiranog švicarskog proizvođača Leica Geosystems, na kojima će studenti geodezije i geoinformatike, kao i građevinarstva, stjecati konkretna praktična znanja i vještine. Ovom donacijom značajno su povećani materijalni kapaciteti Odsjeka za geodeziju i geoinformatiku za izvođenje praktične terenske nastave. Spomenuta oprema od velike je važnosti naročito za studente prvog ciklusa studija, jer je konačno omogućen praktični individualni rad s elektronskim instrumentima već na prvoj godini studija.



*Slika 1.* Donirani elektronski tahimetri

Sadašnje i buduće generacije studenata Građevinskog fakulteta UNSA moći će da uče na doniranim tahimetrima zahvaljujući inicijativi prof. dr. Dušana Kogoja, rukovodioca Katedre za geodeziju pri Odsjeku za geodeziju UL FGG. Uspješna saradnja i prijateljske veze Odsjeka za geodeziju i geoinformatiku GF UNSA i Odsjeka za geodeziju UL FGG traju u kontinuitetu gotovo dvije posljednje decenije, pri čemu je glavnu ulogu imao profesor Kogoj. Prijatelji iz Slovenije dali su značajan doprinos razvoju, napretku i jačanju kadrovskih, naučnoistraživačkih i nastavnih aspekata djelovanja Odsjeka za geodeziju i geoinformatiku. S pravom se može reći da je UL FGG u velikoj mjeri zaslužan što se Građevinski fakultet u Sarajevu, unatoč velikoj konkurenciji, čvrsto etablirao kao vodeća visokoobrazovna i naučnoistraživačka institucija iz

oblasti geodezije i geoinformatike u BiH, pri čemu je značajno povećana njeno međunarodna vidljivost i prepoznatljivost.



*Slika 2.* Studenti Građevinskog fakulteta UNSA na terenskim vježbama sa opremom koju je donirao Fakultet za građevinarstvo i geodeziju UL

Iskrena zahvalnost upućuje se Katedri za geodeziju, Odsjeku za geodeziju i Fakultetu za građevinarstvo i geodeziju Univerziteta u Ljubljani, na čelu sa dekanom prof. dr. Matjažem Mikošem. Vrijedna donacija geodetske opreme će u velikoj mjeri doprinijeti poboljšanju kvalitete studiranja na Građevinskom fakultetu u Sarajevu, u kontekstu ovladavanja studenata rukovanjem geodetskim instrumentima i izvođenjem terestričkih geodetskih mjerenja. Unapređenje materijalno tehničkih uslova rada Odsjeka za geodeziju i geoinformatiku GF UNSA omogućava da u fokusu nastavnog procesa, utemeljenog na modernim obrazovnim standardima, uvijek bude student.

*Nedim Tuno*